

蜀

水

經

蜀水經卷之七

京山李

江水七

江水又東經大溪口受烏飛水

水經注曰烏飛水出天門郡淩中縣北流至沙渠縣南又北流經巫縣歷三道三百七十里注於江吳船錄曰至大溪口水稍濶亦差遠夔峽之險矣烏飛山相對爲燕子坡王十朋詩所謂坡名燕子燕思歸巖號烏飛鳥倦飛也范石湖燕子坡詩曰大山如墻缺

小山如冢衆山直下看方知此峯危

江水又東北經虎鬚灘

杜詩曰瞿塘漫天虎鬚怒

江水又東經泗灘口

泗灘有澗水橫通大江兩山對峙一名錯開峽距大

江五里有斬龍臺

江水又東受赤溪

溪在縣西二十里岸石俱赤其中湫阻有重門複洞

傳爲龍窟

江水又東經流石

石湖集曰縣人以郭石流石堆爲水信流石沒則絕
潁如馬

江水又東北經巫山縣城南

巫山縣故巫咸國也周末爲楚之巫郡秦昭襄王三
十年置巫縣屬南郡漢因之建安中改爲宜都郡晉
初置建平都尉咸寧元年改建平郡置泰昌縣屬之
又置北井縣屬巴東郡泰始五年北井改屬建平又
分置南陵縣宋元嘉中廢南陵後周天和中又分置

永昌郡江陰縣改泰昌爲大昌省北井入之建德中
廢江陰隋開皇廢郡置東陽府十八年改巫縣爲巫
山縣屬信州唐貞觀三年廢東陽宋端拱元年大昌
改屬大寧監元至元二十年省大昌入大寧明洪武
初復置 國朝康熙九年省入巫山○寰宇記日本
夔子熊摯所治也楚王細腰宮在縣西二百步陽臺
古城卽襄王所遊之地臺高一百二十丈南枕長江
入蜀記曰隔江南陵山極高大有路如綫盤曲至絕
頂謂之一百八盤蓋施州正路黃魯直詩一百八盤

携手上至今歸夢繞羊腸按漢書巫縣有夷水東至夷道縣入江過郡二行五百四十里當卽今長陽縣清水之源水色清照十丈故爲清江

江水又東受巫溪巫溪有二源東溪源出陝西平利縣南山中南經大寧縣北受胡岐水又南受泥溪又南經騎馬峽又西南受白露溪又西南經香墩山下又西南經烏龜峽又西南受西溪西溪亦源出平利縣南東流合東溪爲巫溪又西南後溪入之後溪源出太平縣東紅石壩之龍洞南經大寧縣東仙人洞前又南經寶源

山下又南經鹽廩入巫巫溪又西南繞大寧縣城東又南受馬連溪馬連溪源出太平縣東千頃池東南受白楊水又東受水浪溪又東受小溪又東入巫巫溪又南受龍溪又南受土田溪又南爲昌江又南經大昌縣故城南受楊溪楊溪源出竹山縣南之麥場垭又東受清缸江又東入巫巫溪又東南受馬渡溪又東南受茹溪又南受聖泉又南經巫山縣城東入江

水經注曰巫溪導源晉興郡之宜漢縣東又南經建平郡泰昌縣南又經北井縣東轉歷其縣北水南有

鹽水下通又南屈經巫縣東有聖泉下注又南入於
大沔○仙人洞高百餘丈上下皆峭壁一徑可登巖
上石文生成千字水出石筍間四時涓涓不絕俗傳
王子採樵見奕者局未終斧柯已爛謂之王子洞然
是王質爛柯山之說○寶源山山半有穴鹹水瀑布
源源而出居人以竹筒承之煎爲鹽國經所謂一泉
之利足以奔走四方者一溪前陳可濯可沿衆峯峻
絕如削如畫漢書巫縣有鹽官卽此泉也宋監官孔
嗣宗春日與客泛舟飲綠陰下商民鼓吹隨之其樂

不減鷺市○聖泉一名孔子泉王十朋謂泉旁童子多知書

大寧縣故大昌縣地屬夔州路宋開寶六年分置大寧縣故大昌縣地屬之元至元二十年改州明洪武九年改縣

長年云大溪口虎鬚林九頤林四渡口錯開峽野豬岩魚肚坪乾焦灘龍寶灘虎抓林月明山三鏡林玉兔岩下馬灘烏溪灘百客一鎮鏡架灘麥沱流石坪山縣共九十里按龍寶灘著名之險也虎鬚九墩焦

灘三纜下馬次險

江水又折而東南經筓筓山

筓筓山下有灘聲如筓筓亦名驅熊山灘聲如熊也
舟人謂之空王沱迷猴灘江行至此入巫峽矣郭璞
賦曰巴東之峽夏后疏鑿水經注曰巫峽杜宇所鑿
以通江水也王琢崖曰巫山縣之東夷陵山之西連
山疊嶂隱天蔽日凡六七百里水極險迅在巫山下
者爲巫峽巫峽之上爲廣溪峽巫峽之下爲西陵峽
江水又東南經跳石灘

江南岸底有石險阻相傳石自江北山頂跳落反爲
南崖之患

江水又東南經望夫巖

亦名女觀山相傳有官蜀者其婦人登山望夫因化
爲石今江岸有石植立如婦人西望狀望夫石在在
有之蓋緣石象而附會也

江水又東南經清水洞

陸放翁曰洞極深後門自山後出洞黯闇水流其中
鮮能入者歲旱禱雨頗應

江水又東南經大小磨灘

大水最險水經注曰江水東經巫峽歷峽東逕新崩灘此山漢和帝永元十二年崩晉太元二年又崩當崩之日水逆流百餘里湧起數十丈今灘上有石或圓如簞或方如屋皆崩岩所隕致怒湍流故謂之新崩灘其頽崖所餘比之諸嶺尙爲竦桀荊州記曰沿峽二十里新崩灘至巫峽因山爲名

江水又東南經神女廟

其上卽飛鳳峯在縣東三十里舊有斷碑云地平天

成權與於此功被我民十二字儼南岳禹碑今不存
衆神女廟額曰凝真觀宋封妙用真人壇側竹垂垂
若簞有稿葉著壇竹因風掃之終瑩潔宋玉高唐賦
曰昔者先王嘗遊高唐息而晝寢夢見一婦人曰妾
巫山之女也爲高唐之客王因幸之去而辭曰妾在
巫山之陽高邱之阻旦爲朝雲暮爲行雨朝朝暮暮
陽臺之下襄陽耆舊傳曰楚襄王遊雲夢夢一婦人
名瑤姬夏帝之季女封於巫山陽臺精魄爲芝服而
媚焉則與神期八朝集仙錄曰雲華夫人名瑤姬王

母第二十三女太真王夫人之妹也受何風混合萬
景鍊神飛化之道嘗東海遊還過江上至巫山峯巖
挺拔幽麗巨石如壇留神久之時大禹理水駐山下
大風猝起巖振谷隕不可制因與夫人相值拜而求
助夫人卽勅侍女投禹策召鬼神之書遂能導陂決
水以成其功其後楚大夫宋玉以其事言於襄王王
不能訪道要以求長生築臺高唐之館作陽臺之宮
祀之宋玉作神仙賦寓情荒淫穢誣高真豈可誣而
降之也馬永卿神女廟記曰考禹穴紀壩城錄禹導

岷江至瞿塘實爲上古鬼神龍蟒之澤及禹之至護
惜窠穴作爲妖怪風沙晝瞑迷失道路乃仰空而歎
俄見神人狀類玉女授禹太上先天呼召萬靈玉篆
之書且使其神狂章虞餘黃魔大翳庚辰童律爲之
助禹詢童律曰西王母女也受回風混和萬景鍊形
飛化之道館治巫山禹往謁之候忽之間變化不測
或爲輕雲或爲霖雨或爲遊龍或爲翔鸞旣化爲石
又化爲人千態萬狀不可殫述禹詢童律曰上聖凝
氣爲真與道合體非寓胎稟化乃西華少陰之氣也

蓋氣之爲用彌淪天地經營動植大滿天地細入毫
髮在人爲人在物爲物不墜於數不囿於形出有入
無乍隱乍見豈世俗所可窺哉且楚詞者文章淵藪
淵宋爲之冠高唐二賦比之楚詞若秦桑濮於清廟
之側故王逸哀楚詞無此二賦蓋非宋玉所作兩晉
之後庸淺歟生戲弄筆硯剽聞雲雨一語乃於雲雨
之外別求神女不知神女卽雲雨也且懷襄是時爲
強秦所困破漢中轢上庸獵巫黔拔郢都燒夷陵乃
東徙陳其去巫峽益遠此亦可驗也雲溪友議曰段

成式云屈平流放湘沅椒蘭久而不芳卒葬江魚之腹爲曠代之悲宋玉召平之魂明君之失恐禍及身遂假高唐之夢以感襄王非真夢也范石湖曰宋玉談朝雲事先王時本無據依及襄王夢之命玉爲賦但云頽顏怒以自持曾不可乎犯于後世不察一切溷以媒語曹子建賦宓妃亦感此而作此嘲誰當解者愚按天地之初山川融結是爲地輿山峙川流各有歸宿無停滯歷年而不通者且巖石皆土氣所凝久乃堅頑水流之初衝破而出石尙未能爲阻迨土

崩之勢化爲峻巖則水已通矣巫峽開闢蓋自上古
神禹治之鑿阻疏滯人力之所爲無藉神女諸奇也
設禹之未治巫山未開蜀地數千里滙爲魚鼈薮則
昌意何以立國石紐又何生禹焉宋玉二賦詞賦之
家比物託興不可爲事實非特無夢亦無神女詭其
文者遂起廟祀塘城錄益加以怪言夫辨神女之誣
以爲正乃不惜誣神禹之治以爲奇何也且西王母
乃海外之邦爾雅觚竹北戶西王母日下謂之四荒
唐堯西見王母訓東及渠叟漢貳師將軍伐宛斬王

母寡之頭殆猶女媧馮婦本非婦人安得有女爲瑤
姬而俯從周人之姓也明嘉靖十九年中丞李欽以
宋玉賦妖淫毀其廟憲副王喬齡繼而復之夫果佐
禹有功神威赫奕何至一誣於宋玉再毀於李欽也
王母之謬昉自穆天子漢武內傳而後人附會之爾
巫山十二峯天中記曰十二峯者望霞翠屏朝雲松
巒集仙聚鶴淨壇上昇起雲飛鳳登龍聖泉唯南岸
之飛鳳翠屏聚鶴北岸之望霞朝雲松巒集仙登龍
聖泉立於江濱其淨壇起雲上昇距江南岸凡二十

里非立峯頂不可見矣故蘇子由賦峯聯屬以十二
其九可見而三不知入蜀記曰峯巒上入層霄山足
直插江中議者謂太華衡廬皆無此奇然十二峯不
可悉見所見八九峯唯神女峯最爲纖麗奇峭宜爲
仙真所托每八月十五夜月明時有絲竹之音往來
峯頂猿皆鳴呌達旦漸止廟後山半有石壇平曠夏
禹見神女授符書於此壇上觀十二峯宛如屏幃舊
有鳥數百迎送客舟唐幽州刺史李貽詩云羣鳥幸
胙餘近乾道元年忽不至今絕無一鳥不知其故王

漁洋曰過三分水山益奇麗有神鴉四五飛逐行舟
以肉擲之飽卽歸巖洞人蜀記謂絕無一鳥蓋放翁
時未見之也按唐孫光憲詩曰散拋殘食飼神鴉則
鴉之神久矣神女峯卽朝雲峯然神女廟所居或謂
神女峯或謂來鶴峯或謂飛鳳峯隨意命名形狀無
稽陸游謂神女峯最爲纖麗奇峭緣杜詩而虛衍耳
非實有所指爲不可易也

江水又東南經香爐澗

有石如香爐狀

江水又東南經疲石

陸放翁所謂泊疲石夜雨者

江水又東南受萬流溪萬流溪源出湖北建始縣大溪河東北流入江

此楚蜀之界也

江水又東經門扇林

亦名東奔灘吳船錄曰東奔灘高浪大湍巨觸掀舞不當一葉或爲湍所使如磨之旋三老挽拍竿叫呼力爭以出湍

江水又東經三分泉

入蜀記曰泉自山竇中出止兩派俗云三派有年兩派中熱一派或絕流則饑饉

江水又東南經巴東故縣南

西有西瀆東有東瀆放翁謂瀆流通江爲瀆不然也瀆流通江者謂之溪江漲溢溪者謂之瀆自江州而下往往有之或上溢數十里往來通舟楫不獨夔州而夔州瀆獨名以杜詩名

江水又東南經巴東縣城南

入蜀記曰縣有白雲亭天下幽奇絕境羣山環擁層
出間見古木森然往往二三百年物欄外雙瀑瀉石
澗中跳珠濺玉冷入肌骨其下爲慈溪奔流與江會
予自吳入楚行五千餘里過十五州亭榭之勝無如
白雲者驛程記曰巴州有寇萊公祠祠東平臺卽秋
鳳亭其西白雲亭俱倚巴山之麓中爲壽寧寺寺後
有泉流遶寺門下入於江曰相公溪

江水又東經石門關

水經注曰石門灘北岸有山山上合下開洞達東西

緣江步路所由入蜀僅通一人行天下至險也

江水又東南經業灘

此灘險在夏漲漲則渦靡涸則波平諺云有業無新
有新無業蓋新灘在於涸正相反易而峽中之險莫
如二灘矣

江水又東南經咤灘

在州西三里水石相激聲如叱咤卽人鮓甕也山谷
詩云命輕人鮓甕頭船入蜀記曰離歸州出巫峽門
過天慶觀觀下卽叱灘亂石無數吳船錄曰其險又

過東奔然石湖乘漲而下險在業灘蓋悞以業灘爲
咤灘也

江水東南經歸州城南

古秭歸縣也寰宇記曰秭歸城東二十里有故夔子
城荊州記曰秭歸西有楊城卽繹孫所居路史曰夔
卽歸熊姓子爵楚滅之入蜀記曰城中無尺寸土隔
江楚王城亦山谷間地比歸州差平或云楚始封於
此按歸鄉山秀水清故出儁異地險流絕故其性亦
隘

江水東經屈原沱

荊州記曰秭歸縣北一百里有屈平故宅方七頃累石爲屋基今其地名樂平宅東北六十里有女須廟袁崧後漢書曰屈原有賢姊聞原放逐來歸喻令自寬會鄉人冀其見從因名曰秭歸卽離騷女嬃嬋媛以詈余也水經注曰秭歸縣東北數十里有屈原舊田宅縣北一百六十里有屈原故宅此以名沱思賢士也

江水又東經舊州城

明洪武初徙治丹陽卽此水經注曰江水東逕一城
北其城憑嶺作固夾溪臨谷據山枕江北對丹陽城
南枕大江巉峭壁立信天固也楚子熊繹始封丹陽
之所都郭璞注曰丹山今建平郡丹陽城秭歸縣東
七里卽孟涂所居入蜀記曰史記成王封熊繹於丹
陽裴駰云在枝江縣未詳孰是

江水又東逕南遷關

卽夔城也水經注曰江水東南逕夔城南跨據川阜
西北皆枕溪谷東帶鄉溪南側大江明初設巡司於

此後移治新灘按此卽古夔子國楚夷爲九縣之一
者今夔州府則唐武德二年改信州名之資古庸子
之魚色

江水又東經香溪口香溪源出興山縣北高雞寨爲溪
渡河西南經苦口洞又南受南陽河又南經興山縣城
西又東南受建陽河又東南經茅坪舖入江

水經注曰鄉口溪源出縣東南數百里西北入縣唐
李涉詩曰昭君溪上年年月月獨自嬋娟色最濃入蜀
記曰香溪源出昭君村水味美錄於水晶色碧如黛

渡溪至魚洞門小才表丈既入則極大可容數百人
宏敞壯麗如入大宮殿中有石成幢蓋旛旗芝草竹
荀仙人龍虎鳥獸之屬千狀萬態莫不逼真其絕異
者東石正圓如日西石半規如月按王昭君名嬙歸
州人前漢匈奴傳曰昭君初以良家子送入掖庭元
帝時呼韓來朝勅以宮女五人賜之昭君入宮數年
不見積悲怨乃請掖庭令求行西京雜記曰帝常使
畫工圖形召幸宮人皆貽畫工獨王嬙不肯後匈奴
求美人爲閼氏上按圖以昭君行

江水又東經米倉口

舊歸鄉縣城也袁崧曰父老傳言原既流放忽然暫歸鄉人喜悅因名歸鄉

江水又東經兵書峽

湖廣志曰武侯藏兵書處北有隄金灘宋寇萊公過黃牛峽夫人擲金簪默禱於河伯舟至此有鯉魚躍入舟剖之得簪驛程記曰峽半石壁洞中有石形如卷帙俗謂武侯兵書按放翁石湖俱謂是白狗峽水經注曰峽崖竈中隱起有狗形形狀俱足十道記曰

兩峯如脣白石隱隱其狀如狗然今形狀不相似而
水經白狗峽乃鄉口溪所經則當是東界峽杜子美
詩曰白狗斜臨北黃牛更在東

江水又東經夜叉碛

卽荊州記所謂空船峽也水經注曰空冷峽甚高峻
卽宜都建平二郡界其間遠望勢交嶺表有五六峯
參差互出有奇石如二人像褰袂相對俗傳兩郡督
郵爭界於此宜都督郵厥勢小傾議者以爲不如也
又曰東經宜昌縣之挿窰下江之左岸絕崖壁立數

百丈飛鳥所不能棲有一火爐插在崖間望見可長
數尺父老傳言昔洪水之時人薄舟崖側以餘爐插
之巖側至今猶存故先後相承謂之插竈潛確類書
曰空船峽在歸州夏秋水泛必空舟乃可上灘自歸
州至長陽四百餘里內峽水奔流石磧險惡飛鳥不
能棲按峽內惟新灘冬涸乃卸載空舟而下地無空
舟者空船水經注作空冷

江水又東經新灘

宋之新安驛也水經注曰流頭灘峻激奔瀑魚鼈所

不能遊行者常苦之歌曰灘頭白勃堅相持倏忽淪
沒別無期袁崧曰自蜀至此五千餘里下水五日上
水百日入蜀記曰新灘兩岸南曰官漕北曰龍門龍
門水尤湍急多暗石官漕差可行然亦多銳石故爲
峽中最險處非輕舟無一物不可上下舟人冒利至
此可爲戒云江濱南廟有一碑言山崩石壅成此灘
害舟不可計於是著令自十月至二月禁行舟知州
趙誠聞於朝疏鑿之用工八十日灘害乃去皇祐三
年也江絕天聖中至是復通然未悉去若乘水落石

出亦可併力錢銳然居民利敗舟賤買板木及滯留
買賣必搖動此役否則賂石工以爲石不可鑿須斷
以必行乃成又舟所以敗失在重載當大字刻石置
驛前則過者必懲創當告當路者按居民所利不必
敗舟十月以後舟載無論輕重必卸而陸挑肩擔輿
之夫往往獲高價而空舟放流必僱土人操舟高價
抑勒雖長年無如之何土人撻舟乘飛瀑而往舟沒
水丈餘激而復起乃力櫓出之舟子隨舟入水閉息
片時而已殊不驚駭也涸則卸載無敗事者敗事在

欲涸未涸之間

江水又東經馬肝峽

入蜀記曰馬肝峽口兩山對立修聳摩天畧如廬山
江岸多石百丈縈紆極難石壁高絕處有石下垂如
肝故以名峽傍有獅子巖巖中小石蹲踞張頤碧草
被之正如一青獅子微泉泠泠自巖中出亦佳泉也
溪上又有一峯孤起秀麗畧如小孤又陸游過東瀟
灘入馬肝峽詩曰船上急灘如退鷁人緣絕壁似飛
猱

江水又東經塔洞

洞上有淨洪溪卽達溪灘也自此下至南沱百餘里
亂石充塞在在皆灘無一平流處謂之腰站河入蜀
記曰達溪灘際多奇石燦然可愛或文物象符書

江水東經羅尾灘

卽狼尾之訛袁山松謂狼尾灘人灘相去二里今人
灘未知所在上游有端灘野獮灘乃在羅尾之上而
羅尾下有名飯甑倒者湍急舟欹釜甑傾側疑人灘
之異名歟水經注曰人灘水至峻峭南岸有青石夏

沒冬出嶽崙數十步中悉作人面形或大或小其分明者鬚髮皆具

江水又東經鹿角灘虎頭灘

杜甫詩曰狼頭如跋胡鹿角真走險陸游詩曰虎頭崔嵬鹿角橫入蜀記曰過鹿角虎頭使君諸灘水縮已三之二湍險尤可畏

江水又東經無泥灘

江心多紅石絕無沙泥卽唐宋之無義灘也唐李涉詩曰下牢戍口初相問無義灘頭剝別離入蜀記曰

黃牛廟下無義灘亂石塞中流望之可畏然舟過乃不甚覺蓋撻舟之妙也

江水又東經黃陵廟

武侯黃陵廟記曰江左大山壁立林麓峯巒如畫壁間有神像鬚髮鬚眉冠裳宛然前豎一旌旗右駐一黃犢猶有董工開導之勢古傳所載黃龍助禹開江之不誣也惜乎廟貌廢去使人太息神有功開江不事鑿斧願濟舟航當廟食茲土僕復而興之再建其廟貌目之曰黃牛廟以顯神功水經注曰黃牛山下

有灘名黃牛灘南岸重嶺疊起最高巖間有石色如
人負刀牽牛人黑牛黃成就分明既人跡所絕莫得
究焉此巖既高加以江濤紆迴雖途徑信宿猶望見
此物故行者曰朝發黃牛暮發黃牛三朝三暮黃牛
如故言水路紆迴望如一矣入蜀記曰傳云黃牛
廟神佐夏禹有功故食於此上有若牛狀其色赤黃
前一人如着幘立者驛程記曰黃陵廟在山麓前祀
黃陵之神旁有一黃牛舊鐵鑄今易以人後祀武侯
武侯入蜀於山巖見神像始立此廟侯像設是石砧

宜撫司女官秦良玉有崇禎壬申題字又七修類稿
曰黃陵廟有一琴殆如朽木匣於神前傳爲魯班所
造人以一指扶之輒能自行此卽運瓶之術道流假
此以神施捨耳

江水又東經天柱山

入蜀記曰蝦蟆碚稍西有一峯孤起侵雲名天柱峯
自此山勢稍平然江岸皆大石堆積彌望正如渚渠
積土狀

江水又東經蝦蟆碚

一統志曰江之右有石大數丈類蝦蟆其上出泉入
蜀記曰水晶所在第四泉也蝦蟆在山麓臨江頭鼻
吻頷絕類而背脊炮處尤逼真造物之巧有如此者
自背上深入得一洞穴石色綠潤泉泠泠有聲自洞
中出垂蝦蟆口鼻間成水簾入江劍南詩曰不肯爬
沙桂樹邊朶頤千古向巖前巴東峽裏最初峽天下
泉中第四泉張祐水記曰峽州扇子峽下有石突然
洩水獨清泠而狀如龜形俗云蝦蟆石其水爲第四
驛程記曰泉從巖腹洞中流注蝦蟆口鼻間成水簾

下入於江濺珠潰望之極可愛踏江中流亂石潮濕
面上從蝦蟆背至洞中則有水自洞出聲如風雨中
有巨石泉滙其下爲池清冷沁骨巡覽壁間都無前
人題字蓋石質粗疎不任刻畫也循碕左而下衣履
盡濕大索舟中瓶盎三四盡汲貯之此水水晶列在
第四山谷記云泉味亦不極甘冷熨人齒惜自蜀來
無佳茗試發之耳

江水又東經扇子峽

入蜀記曰重山相掩政如屏風扇以此得名又陸游

扇子峽詩云亂雲生翠竇密雪灑青林

江水又東經石碑峽

入蜀記曰石穴有石如老翁持漁竿狀

江水又東經平善壩

吳船錄曰南岸平地峽舟至此皆相慶如更生

江水又東經荆棺峽

古今記曰荆棺峽壁隙有棺以荆爲之昔人有九子
父死不能葬一女編荆爲棺不知其人矣諺云九子
不葬父一女打荆棺

江水又東經南津關

所謂西陵峽也江舟至此出峽矣自夷陵州泝江而上二十里江水至峽口始漫爲平流州當其衝宜都記曰自黃牛灘東入西陵界至峽口百許里山水紆曲而兩岸高山重嶂非日中夜半不見日月絕壁或千許丈其石彩色形容多所像類林木高茂畧盡冬春猿鳴至清山谷傳響泠泠不絕所謂三峽此其一也水經注曰大巫山非惟三峽所無乃當抗峯岷峩偕嶺衡疑其翼附羣山並概清雲更就霄漢辨其優

劣耳其間首尾百六十里謂之巫峽自三峽七百里
中兩岸連山畧無關處重巖疊障隱天蔽日自非亭
午夜分不見曦月至於夏水襄陵沿泝阻絕或王命
急宜有時朝發白帝暮宿江陵其間千二百里雖乘
奔御風不以疾也春冬之時則素湍綠潭迴青倒影
絕巖多生檉栢懸泉瀑布飛漱其間清榮峻茂良多
趣味每至晴初霜旦林寒澗肅常有高猿長嘯屬引
凄異空谷傳響哀轉久絕故漁者歌曰巴東三峽巫
峽長猿鳴三聲淚沾裳宋肇三峽堂記曰峽江跨西

南諸夷合群荆越雋夜郎烏蠻之水榮紆曲折掀騰
洶湧咸歸納於峽口資衆水之會愚按杜子美謂峽
開四千里然實一千三百里蓋始自重慶梁簡文謂
峽山七百里蓋始自夔州荊州記首尾一百六十里
蓋專言巫峽以今考之夔州至巫山一百里巫山至
萬流驛八十里萬流驛至巴東一百二十里巴東至
歸州一百里歸州至屈溪驛八十里屈溪至黃陵驛
一百二十里黃陵至宜昌府一百二十里共七百二
十里而南津出峽距宜昌尚二十里則三峽七百里

不誣也三峽相屬中無間斷兩岸連天削成絕巘一
川行地帶束重淵極天下之險哉又按放翁入蜀記
上峽十一月六日自荆門十二碛泊峽州八日泊石
碑峽九日黃陵廟十日城下十一日馬肝峽口十二
日新安驛十三十四日留驛十五日興山口十六日
歸州十七十八十九日留州二十日過葉灘二十一
日巴東縣二十二日疲石二十三日清水洞二十四
日巫山縣二十五日大溪口二十六日瞿唐關二十
七日至夔州蓋留住者五日而舟行十七日也范石

湖吳船錄下峽七月丁巳自夔州解維宿巫山戊午
下巫山巳未泊歸州庚申辛酉壬戌癸亥甲子乙丑
丙寅丁卯留州八月戊辰泊平善壩巳巳至峽州蓋
畱住者八日而舟行五日也上峽之難下峽之易如
此然乘漲而下不過三日可達宜昌太白謂千里江
陵一日還豪興不可據

長年云巫山縣焦石巖空王沱迷猴林羊旺灘上羊
圈下羊圈跳石上卓牛橫石老鼠磧巴王村來子洞
斷川峽望夫巖清水洞神女廟小磨灘大磨灘沙灘

金巴斗黃老碕白鷺石香爐灘疲石鐵冠峽金鞭峽
萬流驛流水磧烏牛磧小澗瀕馬蓼灘楠木園下卓
牛沱楊家棚燕子溪三洞門扇林官渡口母猪灘雄
灘西漢口舊縣東漢口巴東縣黃蠟石交龍沱磨刀
灘舊牛口上巴斗下巴斗七姐妹石門關業灘鸚鵡
巖方灘陀灘歸州屈原沱烏石蓮花三碕舊州城鐵
心肝黃泥三滾南邏關金盤磧香溪口米倉口白狗
峽石虎林小新灘夜叉碕新灘將軍灘射洪磧石板
灘逗石林驢馬溪馬槽背馬肝枝獅子巖青魚坊青

林井東橋灘杉木溪黑石美人沱青巖灘屈溪上羊
砮下羊砮淨洪溪塔洞白洞鐵爐砮長埠腰磯端灘
野猪灘羅尾灘鱖魚背飯甑倒取水沱上不管下不
管使君灘山斗坪鹿角漩虎頭灘高桅林銅錢堆小
沱大沱大硃灘小硃灘官漕大無泥單刀坪紅石黃
陵廟羅漢溪大紅石小無泥果園逗船沱粗石林馬
鞍灘南沱天柱山喜灘蝦蟆砮黃賴洞猪槽灘扇子
峽稍公石石碑峽打麥場平善壩洪溪黃金藏黃茅
灘白龍洞荆棺峽南津關共水程四百七十里按空

王大磨黑石黃金藏著名之險也香爐庫套跳石最險均勻沱極險繫坊老鼠巴王小磨次險共著名險灘二十四最險灘十極險灘十九次險灘六十八

江水又東經宜昌府東湖縣南

江水又東經宜都縣西北夷水入之

江水又東經枝江縣北沮水入之

江水又東經松滋縣北

江水又東經荊州府江陵縣南零水入之

江水又東經公安縣北油水入之

江水又東經石首縣北

江水又東經監利縣西涌水入之

江水又東經華容縣北

江水又東經岳州府巴陵縣西北洞庭湖注之

江水又東經臨湘縣西北

江水又東經嘉魚縣西陸水入之

江水又東經沔陽州東

江水又東北經武昌府江夏縣西漢陽府漢陽縣東漢水注之又塗水入之

江水又北折而東經黃陂縣東南潏水入之

江水又東經武昌縣北樊水入之黃州府黃岡縣南舉水巴水入之

江水又東經大冶縣北蕪水縣南滂水入之

江水又東經蘄州南蘄水入之

江水又東經興國州東北富水入之

江水又東經廣濟縣南瑞昌縣北

江水又經黃梅縣南九江府德化縣北湓水入之

江水又東北經湖口縣東北鄱陽湖注之

江水又東經彭澤縣北

江水又東北經宿松縣南

江水又東北經望江縣南

江水又東北經東流縣西

江水又東北經安慶府懷寧縣南皖水入之

江水又東北經池州府貴池縣北池口河入之

江水又東北經銅城縣東攄陽水入之

江水又東北經銅陵縣西大通河入之

江水又東經繁昌縣北

江水又東北經無爲州東南濡須水入之

江水又東北經蕪湖縣西青弋江入之

江水又東北經和州東

江水又北經太平府當塗縣北

江水又東北經江浦縣東南

江水又東北經江寧府江寧縣西

江水又東北經上元縣北秦淮水入之

江水又東北經六合縣東滁水入之

江水又東經句容縣北

江水又東經儀徵縣南

江水又東經鎮江府丹徒縣北

江水又東經楊州府江都縣南

江水又東經丹陽縣北

江水又東經武進縣北孟瀆入之

江水又東經泰州南

江水又東經江陰縣北

江水又東經靖江縣南

江水又東經如皋縣東南

江水又東經常熟縣北

江水又東經通州南

江水又東經太倉州北

江水又東經海門縣

江水又東入於海

丹鉛錄曰江出岷山源自西羌萬山來至嘉州而沫
水嵩州合大渡河穿邊界諸山以會之至敘而馬湖
江會之又十五里而南廣江會之至瀘州而內江又
自資簡來會之至重慶而嘉陵江自利闡果合諸州

來會之至涪州而黔江合南番諸水會之至萬縣而
開江自達開等州來會之然後總而入峽是江自峽
西受大水凡入通釋曰自蜀而言大江之外其水有
七綿水雒水湔水涪水嘉陵水巴水渠水七水合於
江雒指曰綿水湔水入雒而巴渠合爲一水則大江
之外爲巨川者四而已矣愚按四川之說或謂江沱
黑白或謂綿涪嘉渠皆非也江爲經流中蜀而行其
左二川曰沱沱水無源而綿雒入之則綿雒卽其源
曰漢漢合巴渠涪白之水入江或者分三流未足與

江敵其右二川日洩洩與沫合而洩源較遠日瀘瀘
與若合而瀘流較大所謂四川也

蜀水經卷之八

京山李 元太初

泚水

泚水謂之大渡水源出松潘廳西徼外羊膊嶺與岷江同源而泚水南流

漢書曰青衣縣蒙山溪大渡水東南至南安縣入泚水出汶江道徼外南至南安縣東入江過郡三行三千四十里水經曰沫水出廣柔徼外東南過旄牛縣北又東至越巂靈道縣南出蒙山東北與青衣水

合東入於江酈注曰泝水出徼外逕汝江道呂忱曰
泝水許慎以爲泝水出蜀汝江徼外從水我聲南至
南安入大渡水大渡水又東入江故山海經曰濛水
出漢陽西入江潯陽西寰宇記曰龍游縣有沫水發
源大渡河一名泝水自陽山縣流入江唐書曰舊制
歲杪運內粟贍黎鵠二州起嘉眉道陽山江而達大
渡勝覽曰府有陽江蜀南方之水所會按漢書濛水
大渡實今之青衣而岷江同源者泝水也隋唐以來
稱此水爲大渡宋太祖玉斧畫大渡河者卽此水

泚水又西經出竈溝受滴漏水

泚水又西經雜谷徼外

泚水又西受縹斯甲布松崗黨壩各土司境內之水

泚水又折而南經促浸

泚水又南經阿爾古

泚水又南經噶刺依有水自控卡山出南入泚

泚水又東南經馬爾邦巴底巴旺

泚水又東南經章谷受攢拉溪攢拉溪源出卓克采之
夢筆山南經大板昭又南經撒拉有水自日爾納山流

入之又南經馬爾當又南經底木達又南經木波有水
自墨爾多山流入之又南經猛古寨有水自巴郎納山
流入之又西南經美諾城東又西南經章谷入泺

金川寺前明世襲演化禪師土職順治九年歸誠授
職初牧占固移牧美諾大金川安撫司色勒奔於雍
正九年歸誠授職初牧茹寨移牧噶刺依俱隸保縣
乾隆三十六年大金川土司郎卡與金川寺僧格桑
梗化大學士阿討平之四十四年置懋功糧務同知
駐美諾分置屯防五員曰懋功駐美諾撫邊駐底木

達章谷駐麥隴溝崇化駐噶刺依慶寧駐阿爾古俱
隸松茂道今廢慶寧別置綏靖屯駐勒烏圍

控卡山卽雪山也一綫烏道爲大小金川要隘其雪
經年不銷雖大暑之月行者衣重裘猶自寒慄每八
月大雪封道植竿爲表呼土蠻導之望表而行畧經
失足卽墮雪窖中凍悶而死謂之雪葬

泚水又南受爐水爐水源出大蓋雪山爲雅納溝南合
東波水又東經打箭爐城受折多山之水又東受劉楊
水又東受頭道水又東經大岡入泚

打箭爐漢旄牛徼外白狼王地也唐宋爲青海部落
元置長河西安撫使隸吐蕃宣慰司明永樂五年土
司阿旺堅參歸化世襲宣慰使 國朝康熙十年土
司蛇蠟墮巴歸化世襲明正宣慰司轄土千戶一土
百戶四十八三十九年置同知節制之隸雅州府今
直隸建昌道○打箭爐在宋爲黎州外番建隆三年
王全斌平蜀以圖上議者欲因兵威復越巂藝祖以
玉斧畫大渡河曰此外吾不有也於是黎州稱極邊
矣後宇文常知黎州或上書乞河外置城邑便互市

詔訪常常言邊隙寢開非福也乃止元置安撫使六
日礪門曰魚通曰黎雅曰長河西曰寧遠而爐地屬
長河西明長河西兼轄魚通寧遠二部而打箭爐有
土官刺瓦蒙遣來使朝名如此矣言煎不言箭也康
熙三十九年昌側集烈據其地提督唐希順討平之
奏置流官有西北二水穿城而東出城處三山之中
謂之葛達山蠻語土山曰拉如昂拉工拉之類石山
曰達如丹達恩達之類山有神靈因而敬畏之漢賈
至者從而禮拜造爲武侯征孟獲命將軍郭達造箭

之說亦妄矣。爐當爲瀘西水皆黑皆以瀘名。○打箭
爐以外土產菜蔬青稞酥油日食牛羊皆巴省巴者
炒麥麵爲之。性嗜茶。茶由內地販運。女子年十五以
上僱給茶客爲沙鴉。任井曰箕帚之事。凡有交易亦
聽沙鴉譯定價值。如牙行焉。其僧謂之刺麻。病則請
刺麻跳神。死則延刺麻卜葬其葬也。或委溝渠。或縛
木椿。或焚投流水。或土覆。礪房惟所卜從之。男婦漆
身垢面者以爲良家。

泔水又東南過瀘定橋

一名安定橋橋跨大渡河以鐵索爲之東西長三十
一丈一尺寬九尺施索九股索之長視橋身餘八丈
有奇上鋪木板可人行不可與馬也唐韋臯李德裕
皆扼此水爲險要議者謂大渡不守則黎雅邛嘉皆
擾曩時河道平廣可通漕舟自玉斧畫河之後河忽
陷五六十丈澎湃如瀑從空而落船筏不通謂之噎
口

泚水又西南折而南經冷磧沈邊二土司

卽唐葉川州地唐長壽元年張元遇迎土蕃降會曷

蘇於大渡水西事覺曷蘇爲土蕃所擒其別部酋咎
插率蠻內附元遇卽其部置葉川州授之仍於大渡
河西山勒石記功後改爲米川州宋廢於蠻 國朝
康熙四十九年沈邊沱邊二土司歸化授長官司世
襲隸化林營

泚水又南受什月水又東南受松林水又東南受鹿子
水又東南受老鴨水

泚水又東受魚通水魚通水源出大小魚洞二源東經
越嶲廳北又東受洗馬姑水又東經晒經關北又東經

寧越營北又東經南站山北受聖泉水又東入潞
晒經關俗云唐僧元奘往西域取經歸過而曝經非
也元奘出由姑藏入由樓蘭何得至此

越嶲廳故關縣也漢置屬越嶲郡諸葛亮征蠻築奴
諾城以憇軍晉省宋復置屬沈黎郡齊省周武帝改
置邛部縣屬邛部郡隋開皇廢郡以縣屬嶺州唐置
都督府唐至德二載沒於吐蕃貞元十三年收復太
和五年爲蠻所破六年從泊臺登咸通中沒於蠻宋
封酋長爲邛部王泊烏弄城元中統五年酋內附置

邛部安撫招討使屬成都府至元十年改屬羅羅斯
宣慰司二十一年改邛部州明洪武初改邛部軍民
州十五年改越嶲軍民指揮使二十六年置越嶲衛
永樂元年分設邛部長官司俱屬四川行都司 國
朝雍正六年改越嶲通判屬寧遠府○越嶲衛在嶺
水西廣之地羣山環繞西通羊圈托爲烏雪東通普
雄大小赤口馬湖諸夷唐有昆明寧遠二軍新安三
阜沙野蘇祁保塞羅山西瀘蛇勇遇戎九城其新安
城傍有六姓蠻曰蒙曰夷曰訛曰狼曰白日勿鄧

洩水又東受嶠水嶠水源出涼山夷西經越嶠歷城東
爲東河北受湧泉水湧泉水源出金馬山北流爲魚洞
河北入嶠嶠水又北受小溪小溪源出五里箐崙東北
合龍泉入嶠嶠水又北受猓獬河又東北受白沙水又
東北受岷嶠水又東北經水箐營南入洩

金馬山有文昌宮云文昌生處明范守已碑記曰金
馬山北距越城不十里而遙山形厓巖晨布其後而
平蕪彌望遙峯隱見蒼烟翠靄間螺聚甌登縹緲極
目山陞石壁削如壁下洞口綽衍大小以十數各有

清流漢出澗澗澎湃匯而爲溪清澈可鑒乃縈繞梓
潼宮前徐折而東若不欲去者然且也曲行沙石間
矯若驚蛇之馳峻阪宮左一石突若百斛困上有卧
羸蹄名痕旁有籍文百餘漫漶不可讀文昌初爲雪
山大仙久之移棲劍嶺西漢末寓形功池晉武帝太
康八年丁未復生鶴南故其自序有曰越裳之西越
鶴之南兩越之間有金馬山勝景清絕生焉其地
涼山漢旄牛縣地在宋爲黎州蠻凡十二種曰山後
兩林蠻在州南七日程曰功部州在州東南十二日

程曰虱琶蠻在州西南一千一百里曰保塞蠻在州西南三百里曰三王蠻亦名部落蠻在州西百里曰西菁蠻在州西三百里曰淨浪蠻在州東南一百五十里曰白蠻在州東南一百里曰烏蒙蠻在州東南千里曰阿宗蠻在州西南二日程曰大雲南蠻曰小雲南蠻卽大理國夷俗尙鬼酋長號都鬼主自州一程至騰州又二程至建昌又十七程至雲南功部於諸蠻中最驕悍狡獪招集蕃漢亡命侵攘他種謂之勿鄧亦名大路蠻居會無縣地其酋長自稱百蠻都

鬼主於宋素稱效順捍禦邊陲嘉定九年逼於雲南
遂伏屬之失西南一藩籬矣明建昌所屬有大頭土
番焚人白夷麼些玃獠猓獠回紇諸種散居山
谷間北至大渡南及金沙江東抵烏蒙西訖鹽井延
袤千餘里 國朝康熙五十五年川撫訪地利知賊
據紅巖爲險紅巖以北有小臘梅松光林載白怙恰
里嗎阿波羅沽巴沽西斜白石巖諸夷紅巖以南有
臘珀青崗林普雄落處必歷老紅羅烏結白諸夷有
大赤口通太平墩爲涼山之咽喉建昌之門戶也其

民謂之羅羅崗谿織記曰羅羅本名盧鹿有黑白二種黑爲大族白爲服役溪目長身面黑齒白故名羅鬼漢火濟從孔明破孟獲封羅甸王世長其土其人佩刀挾弩左肩拖羊皮一方兵爲諸苗之寇諺云水西羅鬼斷頭掉尾男女貴者寢不同簾夜半密通之男去鬚女辦髮纏衫爲禮雞骨占年死不用棺招魂以葬

潑水又東經通望山

卽通望縣故城

泚水又東受漢水漢水源出飛越山洞中東受泥頭水
又東南受彈琴谷水又南受白巖水又南受兩澗水兩
澗水源出邛笮山山有二源流經清溪縣城東西合流
爲清溪又南經試劍山下入漢漢水又南爲流沙河又
南入泚

邛崃山今名象鼻山俗呼相嶺云武侯征蠻之道蓋
象相音訛而附會也漢朱輔上疏曰白狼王唐叢等
慕化歸義路經邛崃大山零高坂峭危峻險百倍岐
道華陽國志曰邛崃山巖阻峻回曲九折乃至山上

凝冰夏結冬則劇寒王陽行部至此而退者也有長嶺苦棟八度之難陽毋閤之峻

清溪縣古髳國也周武王代紂髳人從之後爲西夷
作都國漢元鼎六年誅且蘭殺笮侯開置沈黎郡晉
改沈黎縣屬漢嘉郡永嘉六年李雄據蜀復分置沈
黎郡漢源縣永和三年桓溫平蜀而沈黎漢源俱廢
宋復置沈黎郡後爲獠所據齊謂之沈黎獠郡後周
天和三年開越巂置黎州尋廢隋開皇置沈黎縣屬
邛州兼置大渡鎮仁壽二年置漢源鎮四年改漢源

縣屬雅州大業三年改大渡爲陽山鎮以漢源改屬
臨邛郡唐武德元年分置登州陽山縣九年州廢以
縣屬嵩州貞觀二年漢源改屬嵩州儀鳳二年分置
飛越縣四年分置大渡縣俱屬雅州永徽五年漢源
改屬雅州大足元年分置黎州領陽山飛越二縣景
龍三年州廢長安二年省大渡入飛越長壽二年吐
蕃別部酋獫狁內附置葉川縣尋改米川開元三年
復置黎州天寶元年改州爲洪源郡陽山爲通望縣
又省飛越入漢源尋改郡爲漢源郡乾元復爲黎州

屬劍南道有奉上輟榮劍川合欽蓬口博盧明川施
腋蓬失大渡米川水屬河東南嵐昌明歸化象川叢
夏和良和都附樹東川上貴滑川北川吉川甫寧北
地蒼榮野川卬凍貴林牒珍浪彌卽郭上欽時蓬儼
馬卬川護卬鄜川開望上蓬北逢劍重久護瑤劍明
昌護川索古諾柞栢坡五十二州有洪源軍定蕃飛
越和孤三鎮武侯廓清銅山肅寧大定要衝潘倉三
備仗誼瑠璃和孤十一城宋爲黎州漢源郡屬成都
路領羈縻州羅巖索古秦上合一劇以輟榮蓬口栢

坡博盧明川施腋蓬矢大渡米川木屬河東諾笮甫
嵐昌化歸化粟川叢夏和良和都附木東川上貴滑
川北川古川甫萼北地蒼榮野川邛陳貴林護川牒
宗浪瀾卽郭上欽時蓬儼馬楸查邛川護邛脚川開
望上蓬北蓬剝重久護瑤劍明昌五十四州慶歷七
年省米川通望入漢源元黎州屬吐蕃宣慰司明洪
武八年省漢源入州置長官司土酋馬氏世襲十一
年改安撫司十五年分置大渡守禦千戶所萬歷二
十四年改黎州土千戶所屬四川行都司 國朝並

爲黎大所雍正八年改清溪縣屬雅州府○縣南三十里漢源故城東南六十里沈黎故城東南九十里通望故城西北一百里飛越故城一百里大渡故城
泝水又東經避瘴山

山有二硯一燥一濕每夏秋之際嵐瘴欲發有飛鳶羣集洞中至立冬前後瘴已乃出土人以鳶爲侯相率移避於此山在清溪縣之消瘴堡唐初運道由陽山江而達大渡盛夏地苦瘴毒輦夫多死是清溪之瘴由來久矣

泝水又東經栽眉縣西

泝自邈瘴山而東南出清溪界外經涼山夷之鬼皮
落山箐陡險不通人跡水勢浩大烟瘴特甚至中鎮
始入內地故清溪栽眉水相通而地不相接然栽眉
至建昌舊有驛路明嘉靖間富好禮開之立五堡曰
小普寨曰黑麻溝曰一梳水曰板房曰金石有公館
四所曰舒快曰老木坪曰羅回曰射箭坪各徙越舊
軍守之然夷性反覆不常商賈行旅終不敢經過不
久而廢矣其稱鬼皮落者唐書有夷望鼓路西望安

樂湯谷佛蠻野阿醯阿鵲卸蠻林井阿井十二部落又有奉國苴伽顯養東魯諸部落皆稱鬼主隸雋州

我眉縣故南安地也隋開皇九年分置我眉縣屬眉州大業十一年招慰生羌置綏山縣唐改屬嘉州麟德二年招慰生獠置沐川縣羅目縣上元二年廢沐川羅目儀鳳三年復置羅目久視元年分綏山置樂都縣尋省宋乾德四年省羅目五年省綏山屬嘉定府○縣東四十里綏山故城西南二十里羅目故城

潞水又東受秦水秦水源出中嶽山東南受種玉溪種
玉溪源出龍門山東入秦秦水又南入潞

中嶽山亦名覆蓬山卽緱山也上有葛仙洞列仙傳
曰葛由羌人也周成王時好刻木羊賣之一旦騎羊
入西蜀蜀中王侯貴人追之上緱山隨之者不復還
皆得仙道故里語曰得緱山一桃雖不得仙亦足以
豪有水出焉秦人滅蜀移秦民萬家於此民思故鄉
涇水因呼涇水天寶六年改爲秦水○龍門山卽我
眉山之龍門也兩巖峭壁天餘一線瀑布飛泉直下

百餘丈瀕爲溪潭范成大遊此以爲天下峽泉第一
水中有石似玉故名

泚水東受羅目江羅目江源出大嶽山有二源右源自
小天池而東左源自黃茅坪而北東經羅目縣故城南
二源合流受七里岡之水又東爲臨江溪入泚

七里岡下流有進水洞水漲則容納衆流不見其溢
水涸徐徐溢出沿溪而下入地伏流數里至出水洞
汨汨外噴

泚水又東會沫水

泝水又東經樂山縣城西九頂山入江

中有洲曰黑水尾

沫水

沫水源出天全州西北徼外董卜土司之境

沫水亦名銅江在古爲青衣水晉叢氏青衣勸農子
孫遂爲青衣國梁惠成王十年瑕陽人道青衣水來
歸公孫述據蜀青衣人不服陽嘉二年其王子心慕
漢制求內附因改青衣爲漢嘉縣按寰宇記謂此水
濯衣卽青已爲鑿說傳奇謂秦昭王時見有老人衣

青自峽中出益怪妄矣水經注曰沫水出岷山西東
流過漢嘉郡南流又東逕開刊縣又東逕臨邛縣南
而東出於江

天全州故徙蠻也漢置徙縣屬蜀郡後漢屬蜀國都
尉晉改徙陽縣屬漢嘉郡宋僑移晉原唐置始陽和
川靈關安國四鎮晏山邊臨統塞集衆伐謀制勝龍
遊尼陽八城又四十二部落其距雅州三百里外者
七曰白坡當品嚴城中川鉗奚昌磊鉗井鉗雅州四
百里外者十七曰羅嚴當馬三井東鋒名耶鉗恭畫

重羅林籠羊林波林燒龍達索古敢川驚川梛眉木
燭距五百里外者十三曰諾林斜恭三恭布嵐大馬
論川讓川遠南卑廬夔龍曜川東嘉梁西嘉梁距雅
州六百里外者五日椎梅作重禍林金林羅蓬俱屬
雅州羈縻孟蜀置碉門軍民安撫司宋改碉門砦屬
嚴道縣領羈縻四十四州廢羅嚴增置隸恭百頗會
野常仁等州元至元初置碉門宣撫司改安撫又改
六番招討司又分置天全招討司明洪武初隸四川
行都司永樂中置太平縣尋廢 國朝雍正七年改

流官置天全州屬雅州府○州東二十二里有徙陽
故城卽漢之斯榆也唐書曰雅州西通吐蕃有三道
曰夏陽夔松始陽皆諸蠻錯居明史曰天全爲南詔
咽喉三十六番朝貢出入之路三十六番者二指揮
三宣慰六招討四萬戶府十七千戶所又六番者馬
村蘓村金村楊村隴東隴西也高氏世守之○董卜
韓瑚宣慰使司故吐蕃也明世襲土職永樂九年酋
長南葛遣使朝貢正統間子克羅俄堅桑代政進都
指揮同知掌宣慰司事 國朝康熙元年土司烏兒

結歸化襲宣慰司職駐木坪

沫水南受九子水

龍門河有二源一自邛州九子山西流一自徼外經
冷站河南流會於天全之金雞峽

沫水又東南經魚喜鄉爲魚喜河

名勝記曰雅州西北一里清涼橋東北十里龍門橋
三十五里道遠橋五十里魚喜河橋西七里銅頭河
橋皆索橋也凡橋每歲仲春於兩岸各樹兩梟長二
丈有奇梟上橫穿二桸上布竹繩亘兩岸繩之餘者

屈垂向下輓轡緩束復橫以木梯布以篾笆周以攔
索其高低濶狹視江爲度

沫水又南經靈關

關在縣西北爲外蕃要道亦名通靈山亦名鑊靈山
司馬相如通靈關道左思謂廓靈關以爲門陰鏗謂
王尊奉漢朝靈關不憚遙孔德昭謂靈關九折險也
蜀都賦注曰靈關山名在蒙山縣北水經注曰靈關
縣有銅山有利慈渚寰宇記曰關在縣北二十里峯
嶺嵯峨傍夾大道下有山峽口濶三丈長二百步俗

呼重關集覽曰漢鑿通靈山爲道其地甚險去番界旬日程以繩爲橋質實曰今名臨關其關甚險一人守之可以禦百按兩漢志靈關道屬越嶲郡當在建昌以南與此地同名

沫水又東南經蘆山縣城西受浮圖水

浮圖水源出縣東伏牛山寰宇記曰大渡水從生羌界流入浮圖水浮圖水在縣東五里從生羌界來水中有孤巖狀如浮圖出黃金

蘆山縣故巖道地也晉分置慈池縣泰始九年改護

龍縣後廢隋置蘆山鎮三年改鎮爲縣屬臨邛郡唐
改屬雅州武德元年分置靈關縣大利縣六年省元
末省蘆山入雅州明洪武初復置屬雅州○城東蘆
奴山縣以名焉縣西北有利慈縣故城未知其爲慈
池爲大利也抑或舊設慈利縣而史失之與唐貞元
中韋臯使雅州將路惟明趨吐蕃逋租偏松等城旣
而臯敗吐蕃於雅州克木波城又有業城鬼龍城俱
吐蕃所築又雅州有晏山邊臨統塞集重伐謀制勝
龍遊泥陽八城今諸城不知所在獨木波城在縣西

北逋租城晏山城俱在縣西○漢治中樊敏墓在縣
南七里題漢故檢校巴郡太守樊府君碑碑文首尾
完具載金石錄宋知縣邱常程勤明廣文李一本皆
寶護之而碑以傳又縣南五里有碑面背篆文訛闕
不可識或辨其文爲蘆山縣碑也今呼兩面碑

沫水又東受聖水

聖水性善伏故名初流里許而伏伏三里復出分爲
五流又里許而合

沫水又東南受銅江銅江源出天全州北靈鷲山南經

金波巖又東南經三江渡入沫

名勝記曰蘆山南十里三江渡通天全六番下注多功峽入雅之平羌江水經注曰縣西有濛山青衣水所發東經其縣與沫水會于越嶲郡之靈關道

沫水又南經多功峽受和川和川源出羅巖山東入沫多功峽巖如刀截壁立千仞中流一線相傳神禹于此用功爲多故名名勝記曰多功和上飛仙閣爲木棧道卽古漏閣也梁益記曰大小漏天在雅州西北山谷高深沈晦濛濛多雨而黎州常多風故謂黎風

雅雨宇文溥新路賦曰惟天下之至險有巖道之漏
閣焉孤峯上絕於青天湍波下阻於長川斷巖橫壁
立之岸飛溜濺千尺之泉

和川水晁以道曰禹貢和水今榮經縣北和川自蠻
界羅巖山東來西經蒙山所謂青衣水入岷川也會
彥和曰自巖道而西地名和川夷人居之爲羈縻州
者三十有七蔡九峯曰巖道以西有和川有夷道卽
其地也按禹貢和夷不定是水卽以水論亦當指泝
沫榮經諸水何得以溪流屬之

沫水又南受邛來水邛來水源出邛來山爲榮水南經大通橋又南經花灘又南受甕溪甕溪源出西番箐林東經兩來巖又東南經紫眼關爲紫眼河又東南經太坪入榮榮水又南經黑羊渡又南經大屯渡又南受硃砂溪又東南受經水經水源出瓦屋山北受改丁山下之黑石水又北經榮經縣城南受下改溪又北受烟溪烟溪源出馬耳山爲汶川水北入經經水又北經章公渡與榮水合流爲邛來水東入沫

山海經曰岷山東北一百四十里曰峽山江水出焉

東流注大江又東一百五十里曰岷山江水出焉東
流注大江漢志曰嚴道縣邛來山邛水所出東入青
衣後漢志曰嚴道有邛樊九折坂華陽國志曰道至
險有長嶺苦棟八渡之難楊母閣之峻昔楊氏倡造
作閣故名焉邛來山本名邛苻故邛人苻人界也嚴
阻峻迴曲九折乃至山上凝冰夏結冬則劇寒王陽
行步至此退也郭璞注曰岷邛來山在漢嘉嚴道縣
南江所出水經注曰山海經東北百四十里岷山中
江所出東注於大江岷山邛岷山也在漢嘉嚴道縣

一日新道南山有九折坂夏則凝冰冬則毒寒王陽
按響處平恒言是中江所出矣愚按山海經荒遠本
難考証卽欲強合亦當求諸岷山東北不應在岷山
西南況郭氏以岷山爲南江水經注以岷山爲中江
亦相乖迕丹鉛錄曰禹貢三江旣入說者泥蜀人稅
安禮指掌圖謂豫章水出彭蠡者爲南江以足經文
中北江之數蔡沈書傳主唐仲初吳都賦注松江下
七十里分流東北入海爲婁江東南流者爲東江竝
松江爲三皆與禹貢不合失在從下流求之不從上

流發源處求之耳郭注岷山大江所出岷山南江所
出岷山北江所出徐鉉云江出岷山至楚都名南江
至潯陽爲九道名中江至南潤州名北江入海蓋三
江皆發源於蜀禹貢紀其源而及其委非爲吳地紀
其改易不常之名也按岷岷二山今雖未詳所在據
郭鄴諸說以岷爲邛來山則二水入江不出蜀中何
禹不紀於梁州而遠繫揚州哉況禹貢明以漢江爲
北江升菴宏博亦太昧昧矣

榮經縣故嚴道縣也漢置屬蜀郡初秦始皇滅楚徙

嚴王之族居此漢制縣有蠻夷曰道文帝六年詔徙
淮南王於嚴道卽郵延光初改屬蜀國都尉晉改屬
漢嘉郡李雄之叛地沒於蠻隋開皇中徙嚴道治青
衣唐武德三年分置榮經縣屬雅州太和中李德裕
帥西川築禦侮城雄邊樓以禦蠻乾符二年置金湯
軍靜寇城尋廢於蠻元省縣爲巡司入嚴道明洪武
十三年復置

沫水又東經雅州府城東爲平羌江受長濱江長濱江
源出金雞關東北入沫

雅州府故青衣羌也漢高帝六年開置青衣縣屬蜀郡天漢四年置西郡都尉延光二年改蜀國都尉陽嘉二年改漢嘉縣章武元年置漢嘉郡晉李雄之叛郡縣俱廢宋齊以後推土蒙爲堡主屬益州羈縻西魏廢帝二年置蒙山郡始陽縣隋開皇廢郡爲雅州十三年改始陽爲蒙山大業改蒙山爲巖道廢州入臨邛郡唐武德元年復置雅州領蒙陽長松靈關陽啟嘉良大利六縣六年廢天寶改蘆山郡乾元復爲雅州屬劍南道蜀置永平軍宋爲雅州蘆山郡屬成

都路元改屬嘉定路至元九年改屬吐蕃宣慰司明
洪武四年改直隸州省嚴道入之 國朝雍正七年
改府治雅安縣○州治舊在月心山上大中祥符間
國子博士何昌言爲守以地多嵐瘴徙山麓七修類
稿曰去州數十里石壁一帶上有筆峯長短數千下
有溪巖縣石數百皆五彩錦川文石青白紅紫燦爛
眩目

沫水又東受周公水

俗謂榮水一名長濱江一名周公水莽也榮經二水

在榮經縣南已合流矣寰宇記曰周公山形勢屹然
有龍穴常多陰雨名勝記曰俗呼落牛山山頂有萬
壑亭山半有石筍移之卽雨輿地廣記曰蔡山在雅
州嚴道縣葉少蘊曰蔡山在嚴道縣五里周公山舊
傳諸葛于此夢見周公因立文憲王廟閻百詩曰蔡
山班書酈注竝闕孔穎達司馬貞竝言不知所在徧
考隋書唐書元和通典寰宇九域諸書嚴道無所謂
蔡山也

沫水又南受蒙水蒙水源出名山縣西蒙山南流合百

丈驛東北諸山之水又東南經洪雅縣北草壩入沫
蒙山亦名五頂山在名山縣西十五里山有五頂形
如蓮花五瓣其中頂最高曰上清峯畧圓一坪袤一
丈二尺廣二丈有餘茶樹八株不長不滅相傳漢仙
人吳理真所植也七株高四五寸一株高尺二三寸
夏初發芽歲摘茶三十餘片摘後葉不再發如朽枝
矣土溪寸許故樹不長而雲霧常溼人跡罕到九州
要記曰蒙者沐也雨露常蒙沐也有甘露井極清冽
圖經曰蒙頂茶受陽氣全故芳香獨烈焉茶譜曰山

有五嶺頂有茶園中頂曰上清峯所謂蒙頂也甘露
井側產茶葉厚而圓色紫赤味畧苦春末夏初苜蓿
庇之陰雲覆焉隴蜀餘聞曰茶七株生石上無縫罅
每茶葉生時寺僧報有司往視籍記葉之多少采製
才得數錢許明時貢京師僅一錢有奇瑗石別有數
十株曰陪茶則供藩府諸司也其旁有泉恒用石覆
之味清妙在惠泉之上

水經注曰沫水出岷山西東流過漢嘉郡南衝一高
山上合下開水經其間卽蒙山也昔沫水自蒙山至

南涸巖水脉漂疾破害舟船歷代爲患蜀郡太守李
冰發卒鑿平濶巖河神嶺怒冰乃捺刀入水與神鬪
遂平巖通正水路開處卽冰所鑿也又曰蒙山青衣
水所發東逕其縣北與沫水會于越巂郡之靈關道
元和志曰蒙山在嚴道縣南十里北接羅純山南接
嚴道山寰宇記曰始陽山在蘆山縣東七里本名蒙
山唐天寶六年敕改始陽山高八里東道控歷嚴道
縣橫亘入邛州火井界按此則蒙山在蘆山縣境內
似非今之五頂山蓋蘆山之廬奴山與五頂山相接

也名勝記曰五頂山下青衣水流遶名山縣前下田水口入嘉州通志曰雅水經雅州四十里至草壩與青衣水合水出名山縣有青衣渡去渡十數里卽發源處按此則五頂山流出者爲青衣水矣疆界或殊稱謂或異未足窮也

名山縣故青衣地也西魏分置蒙山縣隋開皇十三年改名山屬邛州仁壽四年屬雅州唐武德初分置百丈鎮貞觀八年改鎮爲縣宋熙寧五年省百丈元祐二年復置明洪武十年省名山十三年復置名山

省百丈入之屬雅州府○縣東北四十里有百丈故
城城東三里有穴周百丈溪不可測故名

沫水又東北受花溪花溪源出榮經縣東南瓦屋山南
經止戈鎮入沫

峨眉山有井絡泉從弓背山逆行而西下巖坪會火
石溪雪水沱亦入花溪○止戈鎮有馬頂巖極險阻
號天生成

沫水又東經修文山

名勝記曰山有田錫書堂洗墨池故蹟

沫水又東經洪雅縣城南爲平鄉江

亦名洪雅川名勝記曰離堆水東西屈曲流百三十里入大江所謂洪雅川也唐武德九年益州郭行方擊破眉州叛獠於洪雅川

洪雅縣漢南安地也隋開皇十三年分置洪雅縣屬眉山郡唐武德九年置犍州貞觀元年州廢屬眉州開元七年置諠州分置平鄉縣八年諠州平鄉廢仍屬眉州宋淳化四年改屬嘉州元至元二十年省入夾江明成化十八年復置

沫水又東經隱蒙山

晉處士龐居正隱處自隱蒙而西有龍吟灘黃豆灘
葫蘆洞龍鼻嘴自隱蒙而東有豬圈門猴子巖皆多
石梁或江水暴漲則巨浪排空及水落未涸則故道
莫辨故舟覆十有五又水漲時節娥渡常汎一支經
城下爲患隱蒙鎮常汎一支由縣南直下築堤捍拒
或庶幾焉

沫水又東受洞溪洞溪源出五峯山東南受慈雲山之
虎溪又東繞城入沫

五峯山峯巒五起惟月珠二峯爲勝前峯如珠之聯
後峯如月之吐

沫水又東經金釜山有靈泉下注

沫水又東受瑪瑙溪瑪瑙溪源出南安鎮南入沫

溪有盤石可以修楔漢鄧通故宅在焉

沫水又東受飛水溪

名勝記曰青衣水來遼縣界而飛水溪注之溪源出
瀑布豈太白所謂瀑布天落半與銀河爭流者耶而
鳳凰天馬虎履伏龜諸山或舞或者或蹲或處左右

而挾持之過縣城下稍平坦宋謝達夫詩兩峯懷抱
揖平川張孝芳詩平川麥穗藹如雲過此而東南三
十里乃作簾鉤之狀晉張神君所謂日移在簾鉤者
此也

沫水又東受天水溪天水溪源出化成山東北過天生
橋東入沫

化成山亦名依鳳岡石湫有門有石筍有雷柱可以
禱雨

沫水又東經鐵石關

一徑通中曲折上下險要天成有千佛巖瀑布懸流
響振林壑

沫水又東南經夾江縣城西南

縣城卽唐南安故城也謂之南安峽口漢章武二年
漢太守黃元叛楊洪度其必乘水東下遣將于峽口
邀遮獲之沫水經城南分流下注爲潭醴爲三大堰
繞而東再分爲八小堰閘水灌田

夾江縣故平羌龍游地也隋開皇十三年分置夾江
縣屬眉州唐武德元年分置南安縣屬嘉州二年改

屬眉州五年省南安七年復置屬諠州入年省南安
入夾江屬嘉州○縣北八十里有夾江故城西北二
十里有南安故城寰宇記曰縣初置涇水上臨江故
曰夾江唐移今理在涇水東平羌西南對我眉北對
象耳

沫水又東南經弱馮鎮

有魏了翁隸書家慶樓記宋名醫皇甫坦居之高宗
爲書清靜二字名其軒明宏治初土人犁田得一印
如玉上刻衛生藥寶爲郡醫所得又一藥臼碎之欲

鑄農器遇火卽爲烟矣

沫水又東經九盤山

山有丈人峯巨石峭拔如人立狀

沫水東經玉屏山

山立如屏高可百丈下爲鹽泉鎮

沫水又東經蘇稽山

相傳蘇東坡稽古處或云蘇頌遷謫處明弘化中掘地得東坡遺硯爲督學王敕取去張鶴鳴傳謂敕於道傍古墳掘得紫石硯二枚各現鸞鶻一隻螭雄相

向或卽此硯也敕山東人有望氣術掘地得白石煮
之分餉諸生掘地得玲瓏石置白泉山掘地得呂仙
紫芝洞三字置峨眉山有分形術鎖院憲廡各各有
敕危坐監視其卒也四城門各各有敕羽衣鶴襲而
去亦能知未來休咎聞其爲諸生時得石匣異書故
通慧也

沫水又東受符文水符文水源出峨眉山有二源左源
出雷洞坪爲白水右源出九老洞爲黑水東經雙飛橋
合流爲符文水又東受伏虎臺之天津水又東經峨眉

縣城北又東經七孔山受馬跳溪粗石溪又東爲蘇溪
又東經尖山入沫

峨眉山亦名牙門山卽西皇人山天皇真人廣成子
授黃帝真一五牙法于此是三十六小洞天之第七
洞謂之虛靈洞天亦名靈陵太妙之天左思所謂抗
峨眉之重阻也自峨山來連岡疊嶂延袤三百餘里
至此突起三峯牙門山高二百二十里爲大峨緩山
高及其半爲中峨鐮刀山高僅緩山之半爲小峨二
峨在大峨之前對峙如拱揖狀西北距成都三百餘

里每秋日清澄望之輒見兩山相對如蛾眉焉雲鬢
凝翠鬢黛遙粧細而長美而艷故唐太宗詩云還似
成都望直見我眉前也山周千里有石龕百一十二
大洞十二小洞二十八名勝記曰前之岷江大出而
尾小背之瓦屋上正而平章遠之雪山纖浮而汨沒
馬志按諸遊記凡遊山者自縣南勝峯門出過馬寨山
進了鴉樓有峩峩峯真境四字魏了翁書西過普安橋
上楊家園沿澗紆行爲瑜伽河經白水庄依山逆行
而上有大光明山碑渡隔虎溪過涼風橋有震旦第

一山坊過橋履危磴爲解脫坡坡前俯眺有石如船
謂之菩薩神船有石刻龍門二字傳爲蘇東坡筆實
富春孫公雙鉤也遊龍門者泝舟而入兩岸千丈各
有瀑布自巖頂飛下盤石承之激爲雨洙舟過其前
衣皆沾濕半巖龍洞空曠木梯可升之而入別有軒
輶授道臺呂純陽創畫十字洞瞿真人升仙石皆在
龍門左右再田解脫坡而上度玉女橋上歸雲閣閣
左行爲青竹橋橋左望玉女峯上有池謂之天女浴
盤由西折而北爲栴木坪巨栴亭亭如蓋爲木涼傘

拾級五十三步及坡之頂爲馬鞍山稍下有萬定橋
橋頭大巖石矗立山半有玉液泉泉側陳圖南大書
福壽二字郭子章大書靈陵太妙之天六字其福壽
字范石湖以爲俗筆蔣太史超云福字取白鶴踏芝
田之象壽字取青龍蟠玉柱之象也其西有呼應臺
相傳孫思邈僧茂真呼應處過神水閣靈文閣曹溪
閣其下有歌鳳臺有楚狂接輿舊廬臺前泉聲四山
皆響不知泉之所由來去謂之山潮再上爲中峯背
倚白巖回環數十峯繞之爲極勝地中峯前爲三望

坡龍升岡岡頂爲樟木嶺其下雙飛橋亂山如屏簇
兩山相對各啟溪流爲白黑二水並歸橋下合流當
兩橋間有清音閣其土小阜爲棲王亭橋南有白雲
青蓮二洞須泝流觀之橋下石壑淺數十丈窈然溪
碧飛湍奔出橋外中有盤澗則牛心石也此間有寶
現溪寶珠溪石筍溝天柱峯金剛石丹砂洞溫涼池
三仙洞雄黃石觀音洞十二峯白雲峽淘米泉曲行
紆入景物最爲佳美踏橋而土則爲象牙坡白縣至
此四十里皆峻阪也然才到山足耳出明月池過白

龍洞經四會亭望大義樓登木皮嶺亦名觀心坡坡
之巔爲回龍山有鬼門關石碑岡茅亭噴石子雷大
小鵝嶺息心所仙女橋諸勝其南爲大雲小雲二壑
亦名大小溪坑山上坦處爲長老坪由坪出山肩上
爲駱駝嶺一級微徑行者往往鉤稜冒刺爲阻俗稱
蛇倒退狀其峻也上九龍坪木龍拐蓮花石有危梯
峭峻之處謂之鵝鵲攢天上爲初喜亭俗稱錯歡喜
傍有洗象池又上爲滑石溝登梅子坡傍巖扶木欄
而行踏凌雲梯俗稱猢猻梯又上爲雷洞坪肅行者

勿許聲張有禁聲碑路左臨巖萬仞蹬道餘處下臨
沉黑凡七十二洞自此石路屈曲八十四盤經窠羅
坪軟草坪洗腳溪上天門石遇七天橋遂及峯頂有
七寶觀光二臺俯瞰大江如線有錫瓦銅瓦滲金三
殿其金殿高二丈五尺廣一丈四尺溪一丈三尺五
寸重巖雕甍繡栱瑣窗覆瓦布地及大士像皆範真
金明蜀藩捐金巨萬爲之旁有光明巖下爲萬仞溪
谷臨巖有欄杆護之每卓午晴明見堦羅綿雲布滿
巖谷如玉如銀爲水波爲織蓋爲樓臺之狀日色照

之有圓光自小而大外暈數重五色絢繅環中虛明
如鏡觀者各見自身現于鏡中舉手動足影亦如之
見已不見人謂之攝身光光上有橋如虹或雲氣散
盡亦有虹霓之光謂之清現爲其不依雲而出也或
白色無紅暈曰水光或如箕曰辟支光或如鏡鉢曰
童子光此晝光也夜有聖燈由一二點起散而爲千
百如散星列布就而拾之則木葉耳又有佛現鳥似
雀而大晝光未發之先輒飛鳴曰佛現佛現此楊升
菴所謂鳥語易隨人意變也惟晝光之奇則巖下有

放光石透白如水晶形如馬牙置之日隙以手撚之
卽成五色雲氣清晨映日則有五色光自下而上又
有壁竇草光如螢火或隱或見雖赤日不掩蓋猶火
井火穴地氣之爲也草木子曰衡山匡廬等處往往
有聖燈七修類稿曰匡廬五臺山皆有放光石有人
握石置日中有五色光此陰氣負陽而光彩自絢亦
山川靈氣也按蜀山之放光者如灌縣青城山岷賓
縣宣化南山富順縣聖燈山射洪縣聖燈山雙流縣
聖燈山蓬州聖燈山清溪縣和尚山彭山縣北平山

資州國明山仁壽縣覺山保縣筆架山天全州懸空
山長寧縣浮來山梁山縣多喜山夜常有光或亦現
於白日咸由崇山大壑或金玉韞而寶氣現或草木
古而妖氣騰或地氣上升或山石自然不足以爲異
也

沫水又東經樂山縣西會泯水入江

明安磐城池記曰嘉定州介山水中西北刊山爲城
東南濱水而堤堤卽城也城東一水自北來曰江水
城南一水自南來曰青衣水自西南徼外來曰沫水

三水皆迅急皆會州東南皆能爲城患而沫爲夏秋之交常平城秦李冰鑿離堆以避其患唐韋臯伐淩雲以殺其怒宋趙紹作斗門以走其暴凡以節茲三水也